



**Općina Stari Grad Sarajevo**  
**Općinski Načelnik**

**Municipality of Stari Grad Sarajevo**  
**Municipality Mayor**

Broj: 01-04-4-3532/25  
Datum: 17.12.2025. godine

Na osnovu člana 85. Statuta Općine Stari Grad Sarajevo („Službene novine Kantona Sarajevo“, broj: 20/24), Općinski načelnik Općine Stari Grad Sarajevo, donosi

### ZAKLJUČAK

1. Predlaže se Nacrt Pravilnika o stipendiranju učenika srednjih škola i studenata sa područja Općine Stari Grad Sarajevo.
2. Predlaže se Općinskom vijeću Stari Grad Sarajevo da razmotri i utvrdi Nacrt Pravilnika o stipendiranju učenika srednjih škola i studenata sa područja Općine Stari Grad Sarajevo.

SEKRETAR OPĆINSKOG  
ORGANA UPRAVE

Adela Plakalo, s.r.

OPĆINSKI NAČELNIK

**Irfan Čengiđ, s.r.**

Dostaviti:

1. Općinskom vijeću Stari Grad Sarajevo;
2. Evidencija;



Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09) i člana 26. Statuta Općine Stari Grad Sarajevo ("Službene novine Kantona Sarajevo", broj: 20/24), Općinsko vijeće Stari Grad Sarajevo, na 13. redovnoj sjednici, održanoj dana 30.12.2025. godine, donijelo je

**PRAVILNIK**  
**O STIPENDIRANJU UČENIKA SREDNJIH ŠKOLA I STUDENATA**  
**NA PODRUČJU OPĆINE STARI GRAD SARAJEVO**

**I – OPĆE ODREDBE**

**Član 1.**  
**(Predmet Pravilnika)**

- (1) Pravilnikom o stipendiranju učenika srednjih škola i studenata na području Općine Stari Grad Sarajevo (u daljem tekstu: Pravilnik) utvrđuju se kriteriji, uslovi i postupak za ostvarivanje prava na dodjelu stipendija učenicima/studentima srednjih i visokoškolskih ustanova sa područja Općine Stari Grad Sarajevo u trajanju od najmanje 12 mjeseci, do dana prijavljivanja na Javni poziv.
- (2) Gramatički izrazi upotrijebljeni u ovom Pravilniku podrazumijevaju oba spola.

**Član 2.**  
**(Aplikanti)**

Aplikanti prema odredbama ovog Pravilnika su:

- a) redovni učenici srednjih škola;
- b) redovni studenti visokoškolskih akreditovanih ustanova, starosti do 26 godina.

**II – OPĆI I POSEBNI USLOVI**

**Član 3.**  
**(Opći uslovi)**

- 1) Pravo na dodjelu stipendija iz Budžeta Općine Stari Grad Sarajevo shodno odredbama ovog Pravilnika ostvaruju učenici i studenti koji ispunjavaju opće uslove, i to kako slijedi:
  - a) čija primanja u domaćinstvu ne prelaze dvije prosječne plate u Federaciji Bosne i Hercegovine prema posljednjem podatku Federalnog zavoda za statistiku, uključujući i druga primanja;
  - b) koji su državljani Bosne i Hercegovine;
  - c) koji imaju prebivalište, odnosno boravište na području Općine Stari Grad Sarajevo u trajanju od 12 najmanje mjeseci;
  - d) koji redovno pohađaju srednju školu, odnosno visokoškolsku akreditovanu ustanovu sa ostvarenim uspjehom, kako slijedi:

- učenici srednjih škola sa najmanjom prosječnom ocjenom 4,50, a učenici prvog razreda srednje škole koji su u devetom razredu ostvarili prosjek ocjena najmanje od 4,50.
- redovni studenti koji prvi put upisuju fakultet/akademiju sa ostvarenim najmanjim prosjekom u IV razredu srednje škole od 4,50;
- redovni studenti fakulteta/akademija iz grupacije medicinskih, tehničkih, prirodno-matematičkih i birotehničkih nauka sa najmanjom prosječnom ocjenom od 8,00;
- redovni studenti fakulteta/akademija iz grupacije umjetnosti, društvenih i humanističkih nauka sa najmanjom prosječnom ocjenom od 8,50.

#### **Član 4.** **(Posebni uslovi)**

- 1) Pored općih uslova utvrđenih odredbama člana 3. ovog Pravilnika, koje kandidati moraju ispuniti dodatno se boduju posebni kriteriji, i to kako slijedi:
  - a) Po osnovu rezultata postignutih na takmičenjima iz svih oblasti, i to od 1. do 3. mjesta za učenike srednjih škola:
    - općinsko takmičenje od 1 do 3 boda;
    - kantonalno takmičenje od 3 do 5 bodova;
    - federalno takmičenje od 6 do 8 bodova;
    - državno takmičenje od 9 do 11 bodova;
    - međunarodno takmičenje od 13 do 15 bodova.
  - b) Po osnovu dostignuća u sportu:
    - učenik ili student koji ima status perspektivnog sportiste Kantona Sarajevo u prethodnoj godini – 2 boda.
  - c) Po osnovu porodičnih prilika:
    - učenik ili student koji živi u višečlanoj porodici, pet ili više članova - 2 boda;
    - učenik ili student bez jednog roditelja – 3 boda;
    - učenik ili student bez oba roditelja – 5 bodova.

### **III – STIPENDIRANJE**

#### **Član 5.** **(Odluka o raspodjeli finansijskih sredstava)**

- 1) Općinski načelnik nakon usvajanja Budžeta za tekuću godinu, a prije raspisivanja Javnog poziva za dodjelu stipendija učenicima srednjih škola i redovnim studentima donosi Odluku kojom se utvrđuje iznos finansijskih sredstava koja se planiraju za stipendiranje shodno odredbama ovoga Pravilnika.
- 2) Ukupna sredstva za stipendiranje procentualno se dodjeljuju za:
  - a) redovno školovanje učenika u srednjem obrazovanju – 40%;
  - b) redovno školovanje studenata na visokoškolskim ustanovama – 60%.
- 3) Procenti utvrđeni u stavu (2) ovoga člana mogu se iznimno izmijeniti, ukoliko je nesrazmjerno veći broj učenika ili studenata, a sve u cilju da što veći broj učenika i studenata ostvari pravo na stipendiju.

## **IV – SREDSTVA**

### **Član 6. (Iznos sredstava)**

- 1) Stipendije se dodjeljuju za tekuću školsku/akademsku godinu i isplaćuju se za period od 9 mjeseci u kojima se nastavni proces odvija (septembar-decembar; februar-juni).
- 2) Visina mjesečne stipendije za učenike srednjih škola i studente iznosi:
  - a) za učenike srednjih škola – 100,00 KM;
  - b) za studente – 150,00 KM.
- 3) Općinski načelnik ima pravo da, u skladu sa raspoloživim sredstvima u Budžetu tokom godine mijenja iznose iz stava (2) ovoga člana i to Odlukom iz člana 5. stav (1) ovoga Pravilnika.
- 4) Iznimno od odredbi ovoga člana, za kandidate koji ispunjavaju uslove, a izvan su procenta utvrđenih članom 5. ovoga Pravilnika, Općinsko vijeće na prijedlog Komisije može odobriti stipendiju za aplikante, ukoliko isti ispunjavaju uslove Pravilnika i ukoliko postoji finansijska mogućnost u Budžetu, u skladu sa rang listom kandidata.

## **V – JAVNI POZIV**

### **Član 7. (Javni poziv)**

- 1) Finansijska sredstva navedena u članu 6. ovoga Pravilnika iz Budžeta Općine Stari Grad Sarajevo dodjeljuju se putem Javnog poziva, koji raspisuje Općinski načelnik.
- 2) Javni poziv iz stava (1) ovoga člana se raspisuje najkasnije do 30.10. tekuće godine i ostaje otvoren 15 (petnaest) dana.
- 3) Javni poziv se objavljuje na web stranici Općine Stari Grad Sarajevo.
- 4) Javni poziv iz stava (1) ovoga člana priprema i dostavlja Općinskom načelniku Služba za obrazovanje, kulturu, sport i mlade.

### **Član 8. (Sadržaj)**

- 1) Javni poziv obavezno sadrži:
  - naziv organa koji raspisuje poziv;
  - osnov ostvarivanja finansijskih sredstava;
  - spisak dokumentacije koja se obavezno dostavlja uz prijavu;
  - prijavni obrazac za Javni poziv;
  - rok za prijavu na Javni poziv;
  - iznos finansijskih sredstava, koja su predviđena za dodjelu stipendija prema odredbama ovoga Pravilnika.

### **Član 9. (Dokumentacija)**

- 1) Aplikant je obavezan uz prijavu, koja je sastavni dio Javnog poziva, dostaviti dokumentaciju (originale ili ovjerene kopije ne starije od 6 mjeseci) kako slijedi:
  - a) prijavni obrazac (pravilno i čitko popunjen);

- b) uvjerenje o državljanstvu ili Izvod iz matične knjige rođenih sa navedenim činjenicama o državljanstvu kandidata za stipendiju;
- c) uvjerenje o kretanju za kandidata stipendiju, ne starije od 30 dana (MUP KS, Stari Grad);
- d) izjava kandidata da se njegovi podaci mogu obrađivati u skladu sa članom. 5. Zakona o zaštiti ličnih podataka Bosne i Hercegovine („Službeni glasnik Bosne i Hercegovine“ broj: 12/25) (dostupna u šalter sali Općine ili na web stranici Općine [www.starigrad.ba](http://www.starigrad.ba)), za maloljetne kandidate izjavu daje roditelj/staratelj i ista treba biti ovjerena od strane nadležnog općinskog organa;
- e) za sve punoljetne članove porodičnog domaćinstva, dokaz o primanjima ili drugom statusu (za nezaposlene/potvrda sa evidencije Službe za zapošljavanje Kantona Sarajevo, za penzionere kopija čeka od penzije kao i drugi dokazi koji se odnose na ostvarena primanja);
- f) ovjerena kućna lista, popunjena na način da sadrži sve tražene podatke za sve članove porodičnog domaćinstva;
- g) ovjerena izjava kandidata da ne prima stipendiju po drugom osnovu;
- h) uvjerenje o upisu u tekuću školsku/akademsku godinu;
- i) uvjerenje o postignutom uspjehu kandidata sa prosječnom ocjenom za prethodnu školsku/akademsku godinu (za učenike prvog razreda srednje škole svjedočanstvo IX razreda, za učenike srednjih škola svjedočanstvo o prethodno završenom razredu, za studente prve godine studija svjedočanstvo o završenom IV razredu srednje škole, i za studente koji redovno pohađaju fakultet uvjerenje o položenim ispitima za prethodnu akademsku godinu);
- j) dokaz o učešću i postignutim rezultatima na općinskom, kantonalnom, federalnom, državnom i međunarodnom takmičenju za prethodnu školsku/akademsku godinu, potvrda ili diploma od nadležnih institucija (resorno ministarstvo, strukovni savez..., original ili ovjerena kopija);
- k) dokaz da kandidat ima status perspektivnog sportiste ostvaren u prethodnoj školskoj/akademskoj godini;
- l) dokaz da je kandidat bez jednog ili oba roditelja (izvod iz matične knjige umrlih);
- m) potvrda o otvorenom računu na ime aplikanta, za maloljetne kandidate žiro račun jednog roditelja/staratelja.

## VI – KOMISIJA ZA POSTUPANJE PO APLIKACIJAMA

### Član. 10 (Komisija)

- 1) Općinski načelnik nakon usvajanja Budžeta za tekuću godinu, te donošenjem Odluke iz člana 5., a prije raspisivanja Javnog poziva iz člana 7. ovoga Pravilnika imenuje Komisiju za postupanje po aplikacijama na Javni poziv za dodjelu stipendija učenicima srednjih škola i redovnim studentima visokoškolskih ustanova.
- 2) Komisija se imenuje na period od raspisivanja Javnog poziva do okončanja procedure izbora kandidata i broji 5 (članova), i to 4 (četiri) člana koji su državni službenici i 1 (jedan) član koji je namještenik.
- 3) Komisija ima zadatak da:
  - pregleda sve aplikacije sa dostavljenom dokumentacijom;
  - aplikacije uz koje nije dostavljena obavezna dokumentacija iz člana 9. ovog Pravilnika odbacuje kao da nisu ni podnesene i o istom obavještava aplikanta pismenim putem;
  - aplikacije koje ispunjavaju kriterije utvrđene ovim Pravilnikom, Komisija obrađuje i boduje te utvrđuje preliminarnu rang listu, na koju aplikanti imaju pravo prigovora Drugostepenoj stručnoj komisiji u roku od 8 (osam) dana od dana prijema obavijesti, odluka Drugostepene stručne komisije je konačna;

- po proteku roka iz prethodne alinee i rješavanju eventualnih prigovora, Komisija utvrđuje konačnu rang listu;
- Komisija dostavlja konačnu rang listu i preporuku Općinskom načelniku, koji predlaže Općinskom vijeću Odluku o dodjeli finansijskih sredstava shodno utvrđenoj rang listi.

**Član 11.**  
**(Prednost)**

Ukoliko prijavljeni kandidati imaju isti broj bodova, prednost će imati onaj kandidat koji ima više bodova po osnovu rezultata na takmičenjima.

**Član 12.**  
**(Obavjest)**

- 1) Svaki aplikant koji nezadovoljava uslove iz Javnog poziva mora biti pismeno obaviješten o rezultatima izbora najkasnije u roku 30 dana od završetka Javnog poziva, a aplikanti koji su ispunili uslove Javnog poziva i dobili stipendiju biće obaviješteni telefonski ili putem objavljene preliminarne/konačne liste aplikanata – korisnika općinske stipendije za redovne učenike srednjih škola i redovne studente sa područja općine Stari Grad Sarajevo.
- 2) Nezadovoljni aplikanti koji su učestvovali u Javnom pozivu, mogu podnijeti prigovor za zaštitu svojih prava Drugostepenoj stručnoj komisiji Općine stari Grad Sarajevo u roku od 8 (osam) dana od prijema obavjesti.
- 3) Odluka Drugostepene stručne komisije Općine Stari Grad Sarajevo je konačna.

## **VII – ODLUKA O DODIJELI FINANSIJSKIH SREDSTAVA**

**Član 13.**  
**(Odluka o dodjeli finansijskih sredstava)**

- 1) Općinsko vijeće na osnovu prijedloga Općinskog načelnika i Komisije iz člana 10. ovoga Pravilnika donosi Odluku o dodjeli stipendija redovnim učenicima srednjih škola i redovnim studentima visokoškolskih akreditovanih ustanova, kojom odobrava dodjelu stipendija aplikantima u skladu sa odredbama ovog Pravilnika.
- 2) Ukoliko bilo koji aplikant dobije stipendiju od nekog drugog fonda ili institucije, po istom osnovu briše se sa bodovne liste, s tim da sljedeći kandidat sa bodovne liste dobiva općinsku stipendiju.
- 3) Ukoliko izabrani kandidat u toku stipendiranja ostvari pravo na stipendiju od nekog drugog fonda ili institucije, dužan je o tome obavijestiti nadležnu službu Općine Stari Grad u roku od 15 dana od dana saznanja, te gubi pravo na stipendiju ostvarenu na osnovu Javnog poziva iz člana 7. ovog Pravilnika, zaključno sa prethodnim mjesecom.

**Član 14.**  
**(Ugovor)**

- 1) Na osnovu Odluke Općinskog vijeća, Općina Stari Grad Sarajevo, koju zastupa Općinski načelnik, zaključuje pojedinačne ugovore o dodjeli stipendija sa izabranim aplikantima, kojim se regulišu međusobna prava i obaveze izabranih kandidata i Općine Stari Grad Sarajevo.

- 2) Ugovor potpisuje student/učenik ili njegov roditelj/staratelj i Općinski načelnik u ime Općine Stari Grad Sarajevo.
- 3) Pravo na stipendiju po ovom Pravilniku može ostvariti jedan ili više aplikanata istog domaćinstva.

**Član 15.**  
**(Obustava stipendije)**

- 1) Pravo Općinskog načelnika je da obustavi isplatu stipendije učeniku/studentu ukoliko:
  - a) napusti redovno školovanje;
  - b) izgubi pravo na dalje školovanje iz neopravdanih razloga;
  - c) ako se utvrdi da prima stipendiju po istom osnovu od neke druge institucije ili fonda;
  - d) promjeni adresu stanovanja.
- 2) U slučajevima predviđenim u stavu (1) ovoga člana, potpisnik Ugovora o stipendiranju dužan je da vrati cjelokupan iznos sredstava Općini Stari Grad Sarajevo, najkasnije do kraja tekuće školske/akademske godine za koju je primio stipendiju po osnovu ovoga Pravilnika.

**VIII – PRELAZNE I ZAVRŠNE ODREDBE**

**Član 16.**  
**(Stupanje na snagu Pravilnika)**

Ovaj Pravilnik stupa na snagu osmog dana od dana objavljivanja u "Službenim novinama Kantona Sarajevo".

**PREDSJEDAVAJUĆI**  
**OPĆINSKOG VIJEĆA STARI GRAD**  
**SARAJEVO**  
**Seid Škaljić**

Broj: 02-45-\_\_\_\_\_/25  
Sarajevo, decembar 2025.

## OBRAZLOŽENJE

### I – PRAVNI OSNOV

Pravni osnov za donošenje ovog Pravilnika sadržan je u odredbama člana 13. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine" broj: 49/06 i 51/09), kojima su utvrđene nadležnosti Općinskog vijeća, dok je članom 26. Statuta Općine Stari Grad Sarajevo ("Službene novine Kantona Sarajevo", broj: 20/24), utvrđeno da je za donošenje propisa i akata u okviru prava i dužnosti Općine nadležno Općinsko vijeće.

### II – RAZLOZI DONOŠENJA

Općina Stari Grad Sarajevo dodjeljuje stipendije po osnovu četiri pravilnika i to:

1. Po osnovu Pravilnika o stipendiranju nadarenih učenika srednjih škola i studenata na području Općine Stari Grad Sarajevo, shodno odredbama kojim pravo na stipendiranje ostvaruju učenici srednjih škola sa najmanjom prosječnom ocjenom 4,80 i redovni student fakulteta/akademija iz grupacije umjetnosti, društvenih nauka, humanističkih nauka sa najmanjom prosječnom ocjenom 9,00 i student fakulteta iz grupacije medicinskih nauka, tehničkih nauka i grupacije prirodno-matematičkih i birotehničkih nauka sa najmanjom prosječnom ocjenom 8,50, dok svi učenici sa prosjekom ocjena 5,00 i učenici prvog razreda srednje škole sa prosječnom ocjenom 5,00 ostvarenom u VI, VII, VIII i IX-om razredu osnovne škole, te student sa prosjekom ocjena 9,50 i više, ostvaruju direktno pravo na dodjelu bez obzira na ukupan broj bodova prikupljen na osnovu drugih kriterija. Visina mjesečne stipendije za nadarene učenike srednjih škola iznosi 150,00 KM, a studente 200,00 KM i isplaćuju se za devet mjeseci u kojima se nastava odvija (septembar-decembar; februar-juni).
2. Po osnovu Pravilnika o stipendiranju učenika/šegрта iz oblasti deficitarnih zanata-obrta/zanimanja, shodno odredbama kojim pravo na stipendiranje ostvaruju redovni učenici I, II i III razreda srednjih stručnih škola (deficitarni obrti /zanimanja), sa najmanjom prosječnom ocjenom 3,00 (obrazovanje u trogodišnjem trajanju). Visina mjesečne stipendije učenicima iz oblasti deficitarnih zanata-obrta/zanimanja iznosi 200,00 KM i isplaćuju se za devet mjeseci u kojima se nastava odvija (septembar-decembar; februar-juni).
3. Pravilnik o stipendiranju učenika i studenata bez roditeljskog staranja na području Općine Stari Grad Sarajevo, shodno odredbama kojim pravo na stipendiranje ostvaruju učenici i studenti bez oba roditelja, odnosno bez roditeljskog staranja, koji su na redovnom školovanju u osnovnim, srednjim i visokoškolskim ustanovama. Visina mjesečne stipendije iznosi: 100,00 KM za učenike osnovnih škola, 150,00 KM za učenike srednjih škola i 200,00 KM za studente. Stipendije se dodjeljuju za tekuću školsku/akademsku godinu i isplaćuju se za devet mjeseci u kojima se nastava odvija (septembar-decembar; februar-juni).
4. Pravilnik o stipendiranju djece boračke populacije, shodno odredbama kojim pravo na stipendiranje ostvaruju djeca boračke populacije sa područja Općine Stari Grad Sarajevo. Pravo učešća na Javnom konkursu imaju djeca boračke populacije (djeca umrlih, poginulih, nestalih branilaca, djeca ratnih vojnih invalida, djeca demobilisanih branilaca, dobrovoljaca, organizatora otpora, ratnih vojnih zarobljenika, djeca lica zaslužnih u odbrambeno-oslobodilačkom ratu i agresiji na Bosni i Hercegovinu). Shodno navedenom Pravilniku stipendije ne mogu ostvariti učenici/studenti čiji članovi porodičnog domaćinstva, u prethodna tri mjeseca, računajući do dana prijave na Javni konkurs imaju mjesečna primanja veća od dvije prosječne plaće isplaćene u Federaciji Bosne i Hercegovine iz prethodne

godine. Minimalan prosjek ocjena kod stipendiranja djece boračke populacije nije utvrđen jer se boduje prosječna ocjena, te drugi uslovi vezani za borački status. Iznos stipendije shodno odredbama citiranog Pravilnika je za učenike u srednjim školama 150,00 KM i za studente u visokoškolskim ustanovama 200,00 KM. Stipendije se dodjeljuju za tekuću školsku/akademsku godinu i isplaćuju se u periodu od 9 mjeseci.

Cijeneći naprijed navedeno konstatuje se da je Općina prepoznala značaj ulaganja u mlade u vidu stipendija kroz različite osnove i grupacije. Uvođenje pravilnika o dodjeli stipendija za učenike koji postižu odličan uspjeh važno je koliko i postojanje Pravilnika za dodjelu stipendija za nadarene učenike, na prvom mjestu zbog motivacije učenika, obzirom da je predloženo da se iznos stipendije razlikuje te se na taj način daje motiv učenicima ne samo da budu odlični nego i nadareni, a nadarenim učenicima se daje posebna satisfakcija da znaju da je njihov rad i trud prepoznat i cijenećen neovisno od drugih kriterija kao što je imovinski cenzus.

Stimuliranje odličnih učenika predstavlja ulaganje u znanje i radne navike mladih te dodjelom stipendija učenicima koji redovno ostvaruju visoke rezultate od strane općine potiče se kontinuirani rad, zalaganje i disciplina, čime se doprinosi općem podizanju obrazovnih standarda u zajednici i na ovaj način uvođenjem stipendija koje nisu samo za nadarene, studenti i učenici dodatno rade na ostvarivanju rezultata jer stipendije nisu samo nagrada, nego i motivacijski instrument kojim se mladima šalje jasna poruka da se trud i uspjeh prepoznaju i cijene.

S druge strane, posebne stipendije za nadarene učenike opravdane su jer ta skupina mladih, zbog svojih iznadprosječnih sposobnosti i postignuća, često zahtijeva dodatnu stručnu podršku, uključivanje u specijalizirane programe, takmičenja i edukacije, što iziskuje veće finansijske troškove. Time se stvaraju uvjeti da nadareni učenici u potpunosti razviju svoj potencijal te ostvaruju rezultate koji mogu doprinijeti većoj vidljivosti i ugledu općine na širem području. Opravdana je različita visina stipendija, odnosno viši iznos za nadarene učenike, jer se time uvažava činjenica da razvoj posebnih talenata zahtijeva veća ulaganja te takav model istovremeno ostavlja prostor za poticanje šire skupine učenika (odličnih učenika), dok najviši standard podrške dobivaju oni čiji potencijal nadilazi uobičajene obrazovne okvire.

Na ovaj način, utvrđivanje različitih kategorija stipendija za odlične učenike i za nadarene učenike, uz diferencijaciju i u iznosu iste Općina uspostavlja pravedan, transparentan i poticajan sistem stipendiranja, kojim se podržavaju i odlični i nadareni učenici, ali uz diferenciran pristup koji odgovara njihovim stvarnim potrebama i doprinosu zajednici, stoga se na ovaj način dugoročno doprinosi razvoju ljudskih potencijala i jačanju obrazovnog uspjeha mladih.

Cijeneći sve naprijed navedeno predlagač je smatrao osnovanim predložiti ovaj Nacrt Pravilnika o stipendiranju učenika srednjih škola i studenata na području općine Stari Grad Sarajevo.

### **III – FINANSIJSKA SREDSTVA**

Finansijska sredstva za provođenje ovog Pravilnika bit će osigurana u Budžetu Općine Stari Grad Sarajevo.

**PREDLAGAČ**

Općinski načelnik putem

Službe za obrazovanje, kulturu, sport i mlade